

Allióngiu A)

Delíbera C.C. n. 38

De su 28.11.1997

Arregulamentu

Sistema de Bibliotecas de sa Comunitadi Montana “Monte Linas”

Títulu 1° - Constituzioni e punnas

Art. 1

Est fatu unu Assótzii cunforma a is artículus 28 e 29 e mudas chi funt sighidas de sa Lei n. 142/90 intra sa Comunitadi Montana e is Comunas ca funt aintru de su territóriu de sa Comunitadi Montana n. 18 “Monte Linas”.

Art. 2

S’assótzii si proponnit, a manera generali, is punnas chi sighint:

- a) Promòviri e coordinai su svilupu de is servítzius de letura púbbrica in manera orgànica cunforma a su territóriu fadendu progetus e propostas de interventu;
- b) Curai a manera arrexonada s’impreu de su patrimóniu libràriu e su manixu de is finantziamentus ca sa Regioni e is àterus Entis podint pònniri a disponimentu de su Sistema;
- c) Fai unu catàlogu solu de totus is òperas tentas de is Bibliotecas ca funt aintru de su Sistema;
- d) Promòviri e favorèssiri is atividadis culturalis;
- e) Incarrerai su servítziu de préstidu interbibliotecàriu aintru de su Sistema;
- f) Spaniai s’informatzioni po médiu de s’impreu de ainas e sistemas audiovisivus giai tentus o pigaus de nou intra is Bibliotecas ca funt aintru de su Sistema;

Art. 3

Si cunsíderant parti de diritu de s’Assótzii is Bibliotecas de is Comunas naradas in s’art. 1. Podint pediri s’adesioni àterus Entis Púbbricus e Privaus e is Bibliotecas ca funt de is Comunas lacanantis. Sa Commissioni de Gestioni, narada in su títulu 2 chi sighit, decidit po su chi pertocat a s’ammissioni insoru e a sa manera de fai is servítzius.

Art. 4

Su Sistema circat, a livellu técticu, formas de cooperatzioni cun àterus Assótzius intercomunalis, Provincialis e Regionalis.

Art. 5

Is Comunas si impínniant, po su chi est prevídiu, po is cosas chi s'ghint:

- a) Assigurai a sa Biblioteca una sedi bella ca permitat sa letura a is mannus e a is piciocheddus e su servítziu de préstidu;
- b) Garantiri s'impreu púbblicu e a indonu de is servítzius e un'oràriu de abèrriri sa Biblioteca ca permitat una gosadura manna de parti de totu sa cominidadi serbida;
- c) Donai a is Bibliotecas personali técticu de ruolu in su tanti necessàriu po su funtzionamentu bonu de is servítzius. Is Comunas ca non tenint ancora personali si impínniant a creai is postus in s'orgànicu ca ddi pertocant intra de is cincu annus chi s'ghint e in s'interis a garantiri is servítzius e s'amannamentu insoru po médiu de "pianus po s'ocupatzioni" finantziaus de sa Regioni.
- d) Stantziai in Bilànciu unu fundu giustu po pigai is líburus, po is atividadis culturalis e po is abisóngius de servítziu de fai a sa cominidadi cosa sua e a su Sistema;
- e) Versai a sa sedi amministrativa Contàbili de su Sistema, candu s'aprovat su Bilànciu annuali, su tanti de £ 500.000 (cincuxentusmilla) po is spesas de gestioni de su Sistema, pigai materiali libràriu e àteras cosas. Sa sedi in chistioni si impínniat po sa parti sua a instituiru unu capítulu de bilànciu bellu po cussu e a rendicontai is spesas minutas e correntis de fai po su funtzionamentu bonu de is Servítzius de su Sistema.

Sa cuota contributiva de is Entis privaus ca funt aintru de su Sistema at a èssiri stabilida fatu fatu de sa Commissioni de Gestioni in su tempus etotu chi sa richiesta de adesioni at a èssiri acollida.

Art. 6

Is Bibliotecas de su Sistema si depint agiudai pari pari ponendu a disponimentu materialis, ainas, esperiéntzias, ideas e informus. Su personali de si Bibliotecas de su Sistema at a dèpiri partecipai a cursus de annoamentu e cualificatzioni professionali ca ant a èssiri apariciaus de s'Assessorau regionali a su Traballu.

Art. 7

Sa sedi amministrativa e contàbili est stabilida in sa sedi de sa Comunità Montana de Gúspini.

Is atóbius de sa Commissioni de Gestioni s'acostumant a fai in sa sedi amministrativa e contàbili. Cussas etotu s'ant a pòdiri fai puru me is sedis de is àterus Entis ca aderint pustis de sa decisioni po custa chistioni fata de sa Commissioni de Gestioni.

Art. 8

Su Sistema de Bibliotecas tenit unu tempus chentza làcana.

Dónnia Enti ca aderit podit firmari a manera definitiva su raportu de adesioni a su Sistema e custu bollit nai ca si cunsiderat acabau a su 31 de meseidas chi sighit a sa richiesta e cussu etotu non at a pòdiri pretèndiri diritus asuba de su patrimóniu pigau cun is fundus de su Sistema. Sa Biblioteca dissociada depit difat torrai totu su patrimóniu, libràriu e nono, de su Sistema ca at a sighiri sa faina sua in is maneras e formas prevídias de custu Arreglamentu.

S'Assótzii si cunsiderat sciortu chi sa mitadi prus unu de is Comunas ca aderint decidat de ndi èssiri. In custa ocasioni su patrimóniu de s'Assótzii at a èssiri pretziu in partis ugualis intra totus is Comunas ca aderint; mentris is bibliotecas de is Comunas ca ant aderi a pustis de sa diri de fundatzioni ant a tènneri diritu a una cuota de cussu patrimóniu pigau a incarrerai de s'annu chi sighit a s'intrada in s'Assótzii.

Títulu 2° - Órganus de s'Assótzii

Art. 9

Po coordinai is servítzius de su Sistema est fata una Commissioni de Gestioni formada diaici:

- Presidenti de sa XVIII Comunità Montana o unu delegau cosa sua, cun funtzionis de Presidenti;
- Síndigus de is Comunas ca aderint o is delegaus insoru;
- Unu responsàbili de su Servítziu bibliotecàriu po dónnia anti ca aderit.

Sa Commissioni de Gestioni at a abarrai in càrriga po totu su tempus de su Sistema e is membrus cosa sua ant a abarrai in càrriga fintzas a sa muda insoru de parti de is Entis innoi appartenint.

Custa Commissioni si atóbiat pustis cunvocatzioni de su Presidenti o candu ddu preguntant sa mitadi prus unu de is cumponentis.

Sa Commissioni de Gestioni s'est atobiada a manera bàllida in 1° cunvocatziuni chi c'est sa mitadi prus unu de is Cumponentis e in 2° cunvocatziuni chi c'est unu quartu de is cumponentis.

Is funtzionis de Segretàriu ant a èssiri fatas de su responsàbili de su servítziu de sa XVIII Comunitàdi Montana.

Is àutus de sa Commissioni de gestioni sunt assutus a manera bàllida candu tenint su votu favorévoli de sa mitadi prus unu de is cumponentis chi ci funt, precisendu ca a cun votus paris at a bínciri su votu de su Presidenti.

Sa Commissioni de Gestioni de su Sistema tenit is incàrrigus chi s'ghint:

- a) Aprovai is programas de svilupu e is progetus detalliaus de interventu de su Sistema ca ddi pertocant.
- b) Coordinai e gestiri is fainas técnicas de su Sistema.

Garantzias e óbligus

Art. 10

Is Entis ca aderint si impínniant a garantiri su funtzionamentu giustu de is servítzius bibliotecàrius cun sedis e personali bellu.

Art. 11

Sa Comunitàdi Montana si impínniat a garantiri su coordinamentu amministrativu e contàbili de su Sistema e una Contribuzioni annuali de £ 200 po dónnia abitanti, ca si podit torrai a stabiliri de annu in annu pustis proposta de ssa Commissioni de Gestioni;

Is Comunas si impínniant a contribui cun is stantziamentus insoru a is spesas de gestioni de su Sistema in su tanti dónnia annu de £ 1000 po abitanti calcolau cunforma a is datus ca arrisultant a su 31.12 de s'annu prima, ca si podint torrai a stabiliri me is esercítzius chi s'ghint pustis proposta de sa Commissioni de Gestioni. Custu impínniu finantziàriu est abasciau de sa mitadi poi s Comunas ca impreant sémpiri in biblioteca assumancu unu incarrigau a su servítziu.

Is Comunas e is àterus Entis ca aderint si impínniant puru a pigai in càrrigu is bènis arricius po contu de su Sistema e a fai parti de su Sistema po assumancu ses annus, comentu a gestoribus de servítzius de interessu sovracomunali.

Impreant is stantziamentus Regionalis segundu sa legislatzioni ca ddis pertocant.

Donatzionis de bènis a su Sistema ant a pòdiri èssiri destinadas a is bibliotecas solas, fata prima s'acetatzioni de parti de su Comunu ca ddis pertocat.

Art. 12

Sa Comunitàdi Montana est su polu de arriferimentu po su manixu amministrativu de is servítzius bibliotecàrius intercomunalis ca pertocant a su Sistema.

Po custu in su bilànciu de sa Comunitàdi Montana est manixau su bilànciu de su Sistema Bibliotecàriu "Monte Linas" cun is intradas fatas de is contributus de is Comunas, de sa Província e de sa Regioni in prus ca de àterus Entis Púbblicus e privaus e cun is bessidas po pigai volumus, arredus, ainas, manixu de su personali, unas cantu atividades.

Sa Comunitàdi Montana impreat is contributus e is finantziamentus po sa realizatzioni de su Sistema, fadendu is compras e is spesas chi serbint po su funtzionamentu de is servítzius intercomunalis e fait sa rendicontatzioni de is contributus destinaus a is servítzius intercomunalis de su Sistema.

A is cumponentis de sa Commissioni de Gestioni, e puru a su personali dipendenti cosa sua, est arriconnota s'indennidadi de missioni po partecipai a is atóbius de coordinamentu, e puru a totus is ocasionis de annoamentu a calisiat livellu fatas.

Art. 13

Is deliberatzionis po is spesas de su Sistema de fai asuba de su bilànciu de su Sistema Bibliotecàriu funt adotadas de sa Giunta Esecutiva de sa Comunitàdi Montana pustis proposta de sa Commissioni de Gestioni de su Sistema.

Is àutus assuntus de sa Commissioni de Gestioni ant a èssiri fatus cun determinatzioni de su Segretàriu e de su Responsàbili de su Servítziu o cun deliberatzionis adotadas de sa Giunta Esecutiva a segunda de is cumpeténtzias.

Art. 14

Is mudas a custu Arreglamentu depint èssiri adotadas cun deliberatzionis de su Consillu de sa Comunitàdi Montana n. 18 e de is Consillus de is Comunas ca aderint a su Sistema.